

STEPNEY, neu STEPNETH (TEULU), Prendergast, Sir Benfro.

Sefydlwyd y teulu gan ALBAN STEPNEY, Sais o sir Hertford a mab i Thomas Stepney o S. Albans o'i wraig Dorothy, merch John Winde o Romsey, Huntingdonshire. Addysgwyd ef yng Nghaergrawnt a Clement's Inn a dywedir iddo ddyfod i Gymru fel cyfreithiwr ifanc yng ngwasanaeth yr [esgob Richard Davies](#) yn ystod yr ymweliad esgobol yn 1559. Ar 31 Rhagfyr 1561 fe'i penodwyd gan yr esgob yn dderbynydd cyffredinol esgobaeth Ty Ddewi am ei oes. Bu hefyd yn gofrestrydd yr esgobaeth. Yn 1565 priododd ei wraig gyntaf, Margaret (c. 1546 - cyn 1573), merch a chyd-efeddes Thomas Catharn o Brendergast a thrwyddi hi y daeth yn berchen ar faenor Prendergast. Cyn 1573 priododd ei ail wraig Mary, merch [William Philipps](#) o Bictwn. Bu'n flaenllaw yn y cylch gwleidyddol lleol a ffurfiwyd gan nifer o wyr bonheddig y sir dan arweiniad [William Philipps](#), mewn gwrthwynebiad i [Syr John Perrot](#) a'i ganlynwyr. Bu'n ustus heddwch dros Sir Benfro a Hwlfordd, yn ddirprwy-raglaw Sir Benfro, yn siryf Sir Benfro yn 1573, 1590, a 1605, a siryf Sir Gaerfyrddin yn 1597, aelod seneddol dros Hwlfordd yn 1572, 1584, a 1586, dros Aberteifi yn 1588, a thros sir Benfro yn 1602; bu farw 19 Awst 1611. Urddwyd ei etifedd, JOHN STEPNEY (ganwyd 1581), yn farwnig yn 1621. Addysgwyd ef yn Rhydychen a Lincoln's Inn. Cyn 1611 priododd Jane, merch [Syr Francis Mansel](#) o Fodlysgwm, Sir Gaerfyrddin. Bu'n ustus heddwch, yn siryf Sir Benfro yn 1614, ac yn faer Hwlfordd yn 1620; bu farw 21 Gorffennaf 1626. Canlynwyd ef gan ei fab Syr ALBAN STEPNEY (c. 1607 - 1628). Brawd hwn, Syr JOHN STEPNEY (ganwyd c. 1618), oedd y 3ydd barwnig. Yn ystod y Rhyfel Cartrefol bu'n gweithredu fel llywodraethwr tref Hwlfordd ac ef oedd un o'r ychydig o wyr bonheddig Sir Benfro a lynnodd yn deyrngar wrth y brenin. Carcharwyd ef gan y fyddin Seneddol ar ôl iddynt ei ddal yn Henffordd yn 1645. Yn 1639 ef oedd siryf Sir Benfro. Bu'n aelod seneddol dros fwrdeisdref Penfro yn 1640 a thros Hwlfordd yn 1640-3. Ef oedd maer Hwlfordd yn 1662 a dirprwy-raglaw Sir Benfro yn 1674. Ei wraig oedd Magdalen, merch Syr Henry Jones o Abermarlais; bu farw cyn 26 Medi 1676. Ei nai, Syr JOHN BAPTIST STEPNEY (bu farw 1681), oedd y 4ydd farwnig; priododd ef Justina Marianna, merch Syr Anthony Vandyke, yr arlunydd. Eu mab, Syr THOMAS STEPNEY, oedd y 5ed barwnig, a'i wraig ef oedd Margaret, chwaer a chyd-efeddes Walter Vaughan o Lanelli. Priodwyd hwy tua 1691-3. Bu'n siryf Sir Benfro yn 1697 ac yn aelod seneddol dros sir Gaerfyrddin yn 1717; bu farw cyn 15 Chwefror 1745. Ymddengys i'r Stepneys dorri eu cysylltiad â Sir Benfro ac ymgartrefu yn Sir Gaerfyrddin (lle y cynrychiolir hwy heddiw gan deulu Stepney-Gulston, Derwydd, a theulu Howard-Stepney, Cilymaenllwyd, ac yn 1772 gwerthwyd eu heiddo yn Sir Benfro. Bu'r 8fed farwnig, Syr JOHN STEPNEY (1743 - 1811), yn aelod seneddol dros sir Fynwy, 1767-83, ac yn weinidog dros y Llywodraeth yn Dresden, 1775-82, a Berlin, 1782-3. Darfu'r urdd farwnig pan fu farw ei frawd, Syr THOMAS STEPNEY (1760 - 1825), gwastrawd dug Caerefrog. Ei wraig oedd Lady Catherine Stepney (bu farw 1845), y nofelydd (gweler *D.N.B.*).

Delia'r *D.N.B.* ag aelod arall o'r teulu hwn, sef GEORGE STEPNEY (1663 - 1707), llysgennad a bardd.

Awdur

Dr Bertie George Charles, (1908 - 2000)

Ffynonellau

West Wales Historical Records (1910–29), vii, 109-42

Burke's Landed Gentrys.n., Stepney - Gulston

Heraldic Visitations of Wales and Part of the Marches between the years 1586 and 1613, under the authority of Clarencieux and Norroy, two kings at arms (Llandovery 1846), i, 180

Trafodion Anrhydeddus Gymdeithas y Cymmrodorion, 1942, 29; 1948, 59

The English historical review, lxi. 18-27

W. R. Williams, *The parliamentary history of the principality of Wales, from the earliest times to the present day, 1541-1895* (Brecknock 1895), 36, 138, 155, 167

Public Record Office, List of Sheriffs for England and Wales ... to A.D. 1831 (1898) (P.R.O.);

Venn, *Alumni Cantabrigienses*

Foster, *Alumni Oxonienses*

A. L. Leach, *History of the Civil War (1642-49) in Pembrokeshire and on its borders* (Llundain 1937)

Richard Fenton, *A Historical Tour through Pembrokeshire* (London 1811), 223-4

Dolenni Ychwanegol

Wikidata: [Q7611055](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

